

Kiskī Duā Qubul Huī

Injeel : Luqaas 18:9-17

Īsā^(a.s) ne ye waaqyā un logoñ ko sunaayā jo apnī baḍāaī karte the aur dusroñ ko neechā samajhte the:⁽⁹⁾

“Do log ibaadatgaah me ibaadat karne gae. Unmeñ se ek bahut hī zyaadā deendaar thā jo shareeyat par amal kartā thā aur dusrā ādmī beeemaan thā jo sarkaarī ṭaiks kī wasulī kartā thā.⁽¹⁰⁾ Jab īmaandaar īnsaan ibaadat karne khaḍā huā to usne is tarah se duā maañgi: ‘E mere rab, maiñ terā shukr adā kartā huñ ki maiñ auroñ ke jaisā naheen huñ. Maiñ un beeemaan logoñ me se naheen huñ jo chorī karte haiñ, dhokā dete haiñ, yā zinā karte haiñ. Maiñ terā shukr adā kartā huñ ki maiñ in ṭaiks wasulī karne waale se behatar huñ.⁽¹¹⁾ Maiñ hafte me do din rozā rakhtā huñ, aur apnī har cheez me se daswaan hissā kḥairaat kar detā huñ.⁽¹²⁾”

“Ṭaiks kī wasulī karne waalā dur par hī khaḍā rahā aur jab usne ibaadat karī, to usne duā maañgte waqt apnā sar sharm se jhukaae rakhā. Usne apne seene ko peetnā shuru kiyā aur bolā, ‘E mere rab! Mere upar raham kar. Maiñ ek gunaahgaar bañdā huñ!”⁽¹³⁾

Tab Īsā^(a.s) ne kahā, “Maiñ tumheñ bataatā huñ, jab ye īnsaan ghar waapas gayā to Allaah rabbul kareem ne isko maaf kar diyā, lekin jo deendaar īnsaan thā usko maafī naheen milī. Jo bhī īnsaan apne āpko azeem banaanā chaahegā to Allaah taa’alā usko neechē jhukā degā aur jo log neechē jhuk kar raheñge to wo unko azeem banā degā.”⁽¹⁴⁾

Kuch log apne bacchoñ ko Īsā^(a.s) ke paas le kar āe taaki wo unheñ pyaar karen. Jab unke shaagirdoñ ne ye dekhā, to unhone logoñ se kahā ki aisā nā karen.⁽¹⁵⁾ Lekin Īsā^(a.s) ne un chōṭe bacchoñ ko apnī taraf bulaayā aur kahā, “In chōṭe bacchoñ ko mere paas āne do. Inheñ nā roko, kyunki Allaah taa’alā kī saltanat unheen logoñ ke liye hai jo in chōṭe bacchoñ ke jaise haiñ.⁽¹⁶⁾ Haqeeqat ye hai ki jo bhī īnsaan Allaah taa’alā kī saltanat ko in bacchoñ kī tarah qubul naheen karegā, to wo usmeñ daaḥḥil naheen ho paaegā.”⁽¹⁷⁾